



Sumáriu Kazu
Tribunál Distritál Baukau
Novembru 2021

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 23

Artigu	Tipu Kazu	Númeru
Artigu 145 Kódigu Penál (KP) & artigu 2, 3, 35 letra (b) no artigu 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	15
Artigu 155 KP & artigu 2 Nu.2(a), 3(c), 35(a) LKVD	Maus-tratus ba menór	1
Artigu 154 KP & artigu 2, 3, no 35 letra (a) LKVD	Maus-tratus ba kónjuje	1
Artigu 145 KP & artigu 2, 3, no 35 letra (b) LKVD, Artigu 20 (1), artigu 2 (2 alinea f) Lei Arma Brankas	Ofensa ba integridade física simples ho natureza violénsia doméstika no arma brankas	2

Artigu 138 KP Artigu 20 (1), artigu 2 (2 alinea f) Lei Arma Brankas	Omisídiu simples no arma brankas	1
Artigu 145 KP & artigu 2, 3, no 35 letra (b) LKVD no artigu 157 KP	Ofensa ba integridade física simples ho natureza VD no ameasa	1
Artigu 138 KP & artigu 23 KP no Artigu 20 (1), artigu 2 (2 alinea f) Lei Arma Brankas	Omisídiu simpes ho forma tentada no arma brankas	1
Artigu 20 (1), artigu 2 (2 alinea f) Lei Arma Brankas	Arma brankas	1
Totál		23

2. Totál desizaun ne'ebé JSMP monitoriza: 20

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	10
Pena multa	Artigu 67 KP	7
Suspensaun ba prizaun nia ezekusaun no absolve	Artigu 68 KP	2
Pena prizaun no omologa	Artigu 66	1
Totál		20

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 3

B. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénssia doméstika

Nú. Prosesu : 0006/21. BCVMS
 Kompozisaun tribunál : Singulár
 Juís : Dra. Florencia Freitas
 Prokuradór : Dr. João Marques
 Defeza : Dr. Sidonio Maria Sarmiento
 Desizaun : Pena multa US\$60.00

Iha 04 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MdSP hasoru nia feen, iha Munisípiu Baukau.

Akuzasaun prokuradór nian

Prokuradór akuza katak iha 21 Maiu 2019 iha oras tuku 19:00 kalan arguidu tuku dala ida iha lezada nia kabaas parte loos. Iha 28 Outubru 2020 iha oras tuku 20:00 kalan sira nia oan fakar etu nune'e arguidu haree tolok lezada no tuku kedas dala ida iha lezada nia ibun.

Prokuradór akuza arguidu komete konkursu krime rua kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak iha 21 Maiu 2019 tuku 19:00, arguidu ho lezada diskute malu kona-ba labarik tanis arguidu tuku dala ida iha lezada nia kabaas no iha 28 Abril 2021 mosu diskusaun kona-ba labarik fakar etu lezada trata fali arguidu dehan la halo serbisu iha natar ne'e mak arguidu nerbozu no tuku dala ida iha lezada nia ibun. Depoide akontese sira di'ak malu kedas, arrepende ninia hahalok, foin primeiravés mai hatan iha tribunál no promete sei la komete tan krime seluk hasoru lezada ka membru família sira seluk iha futuro, nu'udar agrikultór halo natar rezultadu balun faan no balun han.

Alende ne'e, lezada kontinua konfirma faktu sira iha akuzasaun no deklara katak depoide akontese sira di'ak malu kedas no to'o agora arguidu la baku ona lezada.

Alegasaun finál

Prokuradór haktuir katak bazeia akuzasaun no produsaun ba prova provadu katak arguidu komete konkursu krime rua hasoru lezada mezmu sira di'ak malu maibé nafatin tau prevensaun ba arguidu nia konduta iha futuro, nune'e husu ba tribunál atu kondena arguidu ba pena prizaun fulan neen suspende ba tinan ida.

Entretantu, defeza haktuir katak iha audensia julgamentu arguidu konfesa integralmente ba faktu sira hotu ne'ebe imputa ba nian, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e husu ba tribunál aplika pena ne'ebe kmaan liu ba arguidu.

Desizaun

Depoide avalia faktu hotu, tribunál prova katak arguidu komete konkursu krime rua hanesan akontese iha 21 Maiu 2019 iha oras tuku 19:00 kalan arguidu tuku dala ida iha lezada nia kabaas parte loos. Iha 28 Outubru 2020 iha oras tuku 20:00 kalan sira nia oan fakar etu nune'e arguidu haree tolok lezada no emidiata tuku dala ida iha lezada nia ibun.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$

60 kada loron 0,50 centavus durante loron 120. Tribunál mós fiksa pena alternativa durante loron 80 prizaun, bainhira arguidu la kumpri pena multa refere.

2. Krime ofensa ba integridade fizika simples ho natureza violéssia doméstika

Nú. Prosesu : 0085/20. PDBAU
Kompozisaun tribunál : Singulár
Juís : Dra. Florencia Freitas
Prokuradór : Dr. João Marques
Defeza : Dr. Sidonio Maria Sarmiento
Desizaun : Pena multa US\$90.00

Iha 04 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu APJ hasoru nia feen, iha Munisípiu Baukau.

Akuzasaun prokuradór nian

Prokuradór akuza katak iha 24 Jullu 2020 iha oras tuku 22:00 kalan arguidu ho lezada partisipa kazamentu iha Venilale lezada hemu tua *Bir Bintang* ho nia subriñu sira nune'e arguidu haree hodi dehan ba lezada feto selingku dór hafoin arguidu basa kedas dala rua iha lezada nia hasan parte loos no karuk, tuku dala ida iha ulun, tebe dala ida iha kanotak no tuku dala barak iha isin loloon.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha produsaun ba prova arguidu deklara katak iha festa lezada la'o sai ba kotuk ne'e mak arguidu deskonfia kona-ba agresaun iha akuzasaun ne'e loos hotu. Depoisde akontese sira di'ak malu ona, arrepende ninia hahalok, foin primeiravés mai hatan iha tribunál, agora arguidu la baku ona lezada no arguidu serbisu nu'udar *mekániku kareta* kada fulan hetan vensimentu US\$300.00.

Enkuantu lezada deklara katak sira partisipa kazamentu lezada lori tua fó ba arguidu nia família sira mak derepente arguidu bolu lezada no dehan feto selingku dór no arguidu ba basa kedas dala rua iha lezada nia hasan parte loos no parte karuk, tuku dala ida iha ulun, tebe dala ida iha kanotak no tuku dala barak iha isin loloon, depoisde akontese sira di'ak malu no to'o agora la baku ona lezada.

Alegasaun finál

Iha julgamentu arguidu konfesa faktu hotu ne'ebe konstitui ba krime no lezada mós konfirma akuzasaun sein rezerva, motivaun ne'e la nesesariu ba arguidu atu halo agresaun hasoru lezada, mezmú sira diak malu oan maibé nafatin husu ba tribunál atu kondena arguidu ba pena prizaun fulan neen suspende ba tinan ida.

Enkuantu defeza husu ba tribunál fo pena ne'ebé maiz adekaudu ba arguidu tanba arguidu konfesa faktu hotu iha akuzasaun, di'ka malu ona, arrepende ninia hahalok, depoisde akontese to'o agora la baku ona lezada.

Desizaun

Depoisde avalia faktu hotu, tribunál prova katak arguidu basa dala rua iha lezada nia hasan parte loos no parte karuk, tuku dala ida iha ulun, tebe dala iha kanotak no tuku dala barak iha isin.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$ 90 kada loron US\$1.00 durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere

3. Krime ofensa ba integridade fízika simples ho natureza violénssia doméstika

Nú. Proses	: 0004/21. MNLCL
Kompozisaun tribunál	: Singulár
Juís	: Dra. Florencia Freitas
Prokuradór	: Dr. João Marques
Defeza	: Dr. Sidonio Maria Sarmiento
Desizaun	: Pena multa US\$90.00

Iha 04 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BMdC hasoru nia feen, iha Munisípiu Manatuto.

Akuzasaun prokuradór nian

Prokurador akuza katak 02 Maiu 2021 iha oras tuku 07:00 dadeer mosu diskusaun kona-ba tula labarik iha Belbato arguidu nervozu tuku dala ida iha lezada ulun no dudu lezada monu rezulta ain tuur kanek no bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha produsaun ba provas arguidu deklara katak mosu dsikusaun kona ba tula labarik lezada tata fali arguidu nia liman ne'e mak arguidu basa dala ida iha lezada nia ulun, la dudu lezada, depoisde akontese sira di'ak malu kedas, arrepende ninia hahalok foin primeiravés mai hatan iha tribunál no agora arguidu la baku ona lezada arguidu serbisu iha fabrika marmer Manatuto ho vensimentu kada fulan US\$200.00.

Enkuantu lezada deklara katak arguidu apenas basa dala iha nia ulun no konfirma arguidu nia deklarasaun katak la dudu lezada, depoisde akontese sira di'ak malu to'o agora la baku ona lezada.

Alegasaun finál

Iha prosesu julgamentu arguidu konfesa parsial no lezada mos konfirma arguidu nia deklarasaun maibe prokurador mantein akuzasaun tanba krime ne'e iziste ona no mezmu sira di'ak malu ona maibe nafatin tau prevensaun ba arguidu nia hahalok, nune'e husu ba tribunál atu kondena arguidu ho pena prizaun fulan tolu suspende ba tinan ida.

Enkuantu defeza haktuir katak arguidu konfesa faktu ne'ebe konstitui ba krime, di'ak malu ona, arrepende ona ninia hahalok, foin primeiraves halo agresaun hasoru lezada, ho razaun hira ne'e husu ba fo pena maiz adekuadu ba arguidu.

Desizaun

Depoisde avalia faktu hotu, tribunál prova katak tuku dala iha ulun no dudu lezada monu rezulta ain tuur kanek no bubu.

Bazeia ba faktu provadu ne'e no tetu mos sirkunstansia atenuante sira hanesan arguidu konfesa, arrepende ninia hahalok, foin primeiraves mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$ 90 kada loron US\$1.00 durante loron 90. Tribunál mos fiksa pena alternativa durante loron 60 prizaun, bainhira arguidu la kumpri pena multa refere

4. Krime maus-tratus ba menór

Nú. Prosesu : 0026/21. BCBCV
Kompozisaun Tribunál : Koletivu
Juis : Dra. Florencia Freitas no Dra. Jumiaty Maria Freitas Dr. José Q. S. Celestino
Prokurador : Dr. João Marques
Defeza : Dr. Sidonio Maria Sarmento
Desizaun : Pena prizaun tinan 3 suspende ba tinan 3

Iha 05 Novembru 2021, Tribunál Distritál Baukau prezide julgamentu ba krime maus-tratus ba menór ne'ebé envolve arguidu JdSdS hasoru nia oan ho idade tinan 6, iha Munisípiu Baukau.

Akuzasaun Prokurador

Prokurador akuza katak iha 22 Marsu 2021 iha oras tuku 08:00 lezadu halimar hela telefone no bainhira nia alin Celina do Santos tanis husu maibe lezadu la fó telefone nune'e nia alin tanis nafatin. Arguidu hanesan aman nerbozu no lori sinelus baku dala barak iha lezadu nia kotuk laran uza fiu kuluna nian baku iha lezadu nia ulun no liman parte karuk rezulta kanek.

Prokuradór akuza arguidu kontra artigu 155 KP kona-ba maus-tratus ba menor ho moldura penál tinan 2 to'o tinan 6, konjuga ho artigu 2 Nu.2(a), 3(c), 35(a) LKVD.

Produsaun ba prova sira

Iha prosesu julgamentu, arguidu konfesa faktu hotu ne'ebe imputa ba nian. Arguidu mós deklarata katak arrepende ninia hahalok no di'ak malu ona ho lezada akontese ikus arguidu la baku ona lezaduinklui membru familia seira seluk to'o agora.

Iha parte seluk, lezadu dekalra ho nia versaun katak lezadu halimar telefone no alin Celina tanis tuir telefone maibé arguidu la baku lezadu.

Alegasaun finál

Prokuradór haktuir katak arguidu konfesa faktu sira akusaun sein rezerva no konfirma mós ho foto grafia katak lezadu nia kotuk laran no liman mean, arguidu nia konduta ne'e priense krime ne'ebé akuza ba nia, nune'e husu ba tribunál atu aplika pena prizaun tinan rua suspende ba tinan rua.

Entretantu defeza husu ba tribunál atu aplika pena ne'ebé kmaan liu ba arguidu ho konsiderasaun sira katak arguidu konfesa faktu sira, foin primeiravés mai hatan iha tribunál, di'ak malu ona ho lezadu no to'o agora la baku ona lezadu.

Desizaun

Depoisde avalia faktu hotu, tribunál prova katak arguidu lori sinelus baku dala barak iha lezadu nia kotuk laran uza fiu kuluna nian baku iha lezadu nia ulun no liman parte karuk rezulta kanek.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiraves baku lezada, depoisde akontese sira di'ak malu ona, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

5. Krime ofensa ba integridade fízika simples ho natureza violénsia doméstika

Nú. Prosesu	: 0010/21. BCVMS
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. João Marques
Defeza	: Dr. José Maria Caetano Guterres
Desizaun	: Pena multa US\$45.00

Iha 08 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdC (mestre) hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 09 Agostu 2021 iha oras tuku 15:00 loraik lezada fanu arguidu ne'ebe toba hela no dehan ba arguidu katak aban ba eskola karik hein labarik hau ba hili ai lai nune'e arguidu hadeer hirus emidiata tuku dala ida iha lezada nia rein toos tebe dala ida iha kotuk laran riba lezada ba iha rai tuku dala rua iha ulun tebe dala rua iha kotuk laran dudu malu arguidu nia liman kona lezada nia hasan rezulta kanek.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD

Produsaun ba prova sira

Iha prosesu julgamentu, arguidu hili direitu nonok.

Alende ne'e, lezada kontinua konfirma faktu sira iha akuzasaun sein rezerva, depoisde akontese sira di'ak malu fali ona to'o agora sira moris hamutuk nafatin no la baku ona lezada.

Alegasaun finál

Prokuradór haktuir katak mezmu arguidu hili direitu nonok maibé lezada konfirma akuzasaun katak arguidu halo agresauun hasoru lezada, nafatin tau prevensaun ba arguidu nia konduta iha futuru husu ba tribunál atu kondena arguidu ba pena prizaun fulan tolu uspende ba tinan ida.

Entretantu, defeza husu ba tribunál fo justisa ne'ebe justu ba arguidu mezmu arguidu hili direitu nonok maibé haree ba lezada nia deklarasaun hanesan sira di'ak malu ona no moris hamutuk nafatin to'o agora arguidu la baku ona lezada.

Desizaun

Depoisde avalia faktu hotu, tribunál prova katak arguidu utuku dala ida iha lezada nia rein toos tebe dala ida iha kotuk laran riba lezada ba iha rai tuku dala rua iha uluntebe dala rua iha kotuk laran dudu malu arguidu nia liman kona lezada nia hasan rezulta kanek.

Bazeia ba faktu provadu sira no tetu mós sirkunstánsia atenuante sira hanesan depoisde akontese sira di'ak malu ona, nune'e tribunál konklui prosesu ne'e no kondena arguidu ho pena multa US\$ 45.00 kada loron 0,50 centavus durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere

6. Krime ofensa ba integridade física simples ho natureza violénssia doméstika

Nú. Prosesu : 0006/21. MNLLB

Kompozisaun tribunál : Singulár

Juís : Dr. José António d. Escurial

Prokuradór : Dr. João Marques
Defeza : Dr. Sidonio Maria Sarmiento
Desizaun : Pena multa U\$15.00

Iha 08 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade fízika simples natureza violénsia doméstika ne'ebé envolve arguidu SdES hasoru nia feen, iha Munisipiu Manatuto.

Akuzasaun prokuradór nian

Prokuradór akuza katak iha loron sesta-feira 30 Abril 2021 iha oras tuku 09:00 kalan arguidu diskute malu ho lezada kona-ba arguidu foti osan US\$40.00 iha lezada nia karteira hodi selu ba ema ne'ebé hadia sira nian televizaun, derepente arguidu tuku dala ida iha lezada nia matan laran rezulta ran sai.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak antes ne'e informa ba lezada katak ema hadia televizaun ne'e selu US\$40.00, maibé lezada tolok ne'e mak arguidu hirus tuku dala ida iha lezada nia matan fukun, depoisde akontese sira di'ak malu kedas iha eskuadra Polisia, foin primeiravés mai hatan iha tribunál no promete sei la komete tan krime seluk hasoru lezada ka membru família sira iha futuru. Arguidu nu'udar motorista ba instituisaun PNDS nian ho vensimentu kada fulan US\$171.00.

Alende ne'e, lezada kontinua konfirma faktu sira iha akuzasaun no deklara katak depoisde liu tiha loron tolu, sira di'ak malu fali no to'o agora arguidu la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun ne'ebé nia komete no konfirma mós husi lezada, tanba ne'e husu ba tribunál atu fo suspensaun ba arguidu hodi hadia nia hahalok iha futuru.

Entretantu, defeza husu ba tribunál atu aplika pena ne'ebé kmaan liu ba arguidu tanba arguidu konfesa, arrepente ninia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu tuku dala ida iha lezada nia matan laran rezulta ran sai.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiraves baku lezada, depoisde akontese sira di'ak malu ona, nune'e tribunál konklui prosesu ne'e no kondena arguidu ho pena multa US\$15.00 kada loron 0,50

sentavus durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere

7. Krime maus-tratus ba kónjuje

Nú. Prosesu : 0011/20. BCSIC
Kompozisaun Tribunál : Koletivu
Juis : Dr. José António d. Escurial no Dra. Maria Modesta de Almeida Viera no Dra. Sribuana da Costa,
Prokuradór : Dra. Remizia de Fátima da Silva
Defeza : Dr. Germano Guterres Ramos
Desizaun : Pena prizaun tinan 3 suspende ba tinan 3

Iha 09 Novembru 2021, Tribunál Distritál Baukau prezide julgamentu ba krime maus-tratus ba kónjuje ne'ebé envolve arguidu JdS (membro PNTL) hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 31 Janeiru 2020 iha oras tuku 09:00 arguidu fila husi serbisu kalan ho kondisaun lanu ne'e mak lezada hasee arguidu emidiata buti lezada nia kakorok dudu rabat ba didin loloon no basa dala rua iha lezada nia kanuruk. Iha 01 FEVEREIRU 2020 MADRUGADA ARGUIDU BASA DALA RUA IHA LEZADA NIA ULUN, TEBE DALA RUA IHA LEZADA NIA KNOSORIN LOOS, TUKU DALA IDA KNOSORIN KARUK NO BASA DALA IDA IHA LEZADA NIA HASAN PARTE KARUK.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu ne'ebe imputa ba nian no deklaratan katak arguidu fila husi servisu iha oras tuku 19:00 tanba iha dalan kolega sira bolu arguidu hemu tua ne'e mak to'o uma tarde tanba lezada ko'alia bei-beik ne'e mak arguidu nerbozu halo agresaun, kalan ne'e lezada ba toba iha maun sira nian uma ne'e mak tuku 07:00 dadeer arguidu ba bolu mai fali mosu diskusaun ne'e mak arguidu nervozu halo tan agresaun. Arguidu mós deklaratan katak arrepende ninia hahalok foin primeiravés mai hatan iha tribunál no di'ak malu ona ho lezada akontese ikus arguidu la baku ona lezada to'o agora.

Iha parte seluk, lezada dekalra katak momentu ne'e arguidu fila kalan ho kondisaun lanu ne'e mak lezada ko'alia derepende arguidu ka'er lezada nia kakorok rabat ba didin loloon no basa dala rua iha lezada nia hasan. Lezada nu'udar kuzineira iha ospital Riamari Baukau madrugada atu ba serbisu arguidu halo tan agresaun hasoru lezada,

basa dala rua iha lezada nia ulun, tebe dala rua rua iha lezada nia knosen sorin loos, tuku dala ida knosen sorin karuk no basa dala ida hasan parte karuk, di'ak malu ona to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada bazeia ba arguidu nia deklarasaun no konfirmasaun lezada nian, arguidu halo tratamentu kruel tebes hasoru lezada, mezmu sira di'ak malu ona, husu atu fó pena ne'ebé bele prevene arguidu ninia hahalok iha futuru tanba arguidu nu'udar membru PNTL no eduka arguidu katak halo agresaun hasoru nia membru família ne'e sei hetan kastigu todan. Konsiderasaun sira ne'e hotu, husu ba tribunál atu aplika pena prizaun tinan rua suspende ba tinan rua.

Entretantu defeza husu ba tribunál atu aplika pena ne'ebé maiz adekaudu ba arguidu ho konsiderasaun sira katak arguidu konfesa faktu sira hotu, foin primeiravés mai hatan iha tribunál, di'ak malu ona ho lezada no to'o agora la baku ona lezada.

Desizaun

Depoisde avalia faktu hotu, tribunál prova katak 31 Janeiro 2020 iha oras tuku 09:00 arguidu arguidu buti lezada nia kakorok dudu rabat ba didin loloon no basa dala rua iha lezada nia kanuruk. Iha 01 Fevereiro 2020 madrugada arguidu basa dala rua iha lezada nia ulun, tebe dala rua rua knosen sorin loos, tuku dala ida knosen sorin karuk no basa dala ida iha lezada nia hasan parte karuk.

Bazeia ba faktu provadu sira ne'e hotu no tetu mós sirkunstánsia atenuante sira hanesan arguidu foin primeiravés baku lezada, depoisde akontese sira di'ak malu ona, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

8. Krime ofensa ba integridade física simples ho natureza violéncia doméstika no arma brankas

Nú. Prosesu	: 0003/19. VQLLT
Kompozisaun Tribunál	: Koletivu
Juis	: Dra. Maria Modesta d. A. Viera, Dra. Sribuana da Costa no Dr. José António d. Escurial
Prokuradór	: Dr. Julio da Silva Correia
Defeza	: Dr. Grigório Maria Lourdes de Lima
Desizaun	: Pena únika tinan 3 suspende ba tinan 3

Iha 09 Novembru 2021, Tribunál Distrital Baukau prezide Julgamentu leitura akordaun ba krime ofensa ba integridade física simples ho natureza violéncia doméstika no arma brankas ne'ebé envolve arguidu BP hasoru nia feen, iha Munisípiu Víkeke.

Akuzasaun Prokuradór

Prokuradór akuza katak iha 03 Abril 2019 iha oras tuku 10:00 dadeer arguidu informa ba lezada atu foti balde hodi lalin akar nune'e lezada ko'us sira nia oan ne'ebé sei ki'ik no lezada foti duni balde ne'e no fó ba arguidu. Arguidu haree lezada ko'us labarik la'o ba mai iha loron laran ne'e mak arguidu hirus hodi katana ne'ebé nia kaer ne'e, uza katana nia kotuk taa lezada nia ulun klaran no kona mós ulun parte oin rezulta kanek.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no Artigu 20 (1), artigu 2 (2 alinea f) Lei Arma Brankas ho muldura penál tinan 3 to'o tinan 6.

Produsaun ba prova sira

Iha prosesu julgamentu, arguidu deklara katak arguidu taa hela akar no lezada ko'us sira nia oan la'o ba mai iha loron manas ne'e mak arguidu hirus uza katana nia kotuk taa lezada nia ulun parte klaran no katana nia tutun kona iha lezada nia ulun parte oin. Depois akontese arguidu ta'uk halai tiha, maibé depois arguidu entrega-an ba Polísia, perante família rua sira di'ak malu ona, arrepende ninia hahalok, foin primeiravés mai hatan iha tribunál. Arguidu nu'udar agrikultór rezultadu sustenta de'it ba família.

Alende ne'e, lezada kontinua konfirma faktu sira iha akuzasaun no deklara katak arguidu uza duni katana nia kotuk mak taa iha lezada nia ulun parte klaran no katana nia tutun kona iha ulun parte oin, lezada oin la nakukun kontinua halai ba sentru saúde no Polísia, lezada sente durante loron rua hanesan ne'e mak nia sente kanek sira ne'e di'ak fali no la fó inpaktu ba lezada nia moris.

Alegasaun finál

Prokuradór haktuir katak arguidu konfesa faktu hotu iha akuzasaun ne'ebé nia komete no konfirma mós husi lezada. Arguidu nia hahalok ne'e rezulta lezada sofre kanek iha ulun no lezada ba tratamentu iha sentru saúde hafoin mak rekopera fali mezmu sira di'ak malu ona maibé nafatin tau prevensaun ba arguidu nue'e labale hatoman-an uza katana hodi rezolve problema, tanba ne'e husu ba tribunál atu kondena arguidu ho pena únika tinan tolu suspende ba tinan tolu.

Entretantu, defeza husu ba tribunál atu aplika pena ne'ebé maiz adekua ba arguidu tanba arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu komete konkursu ba krime rua katak arguidu uza katana ne'ebé nia kaer, arguidu lori katana nia kotuk taa iha lezada nia ulun klaran no ulun parte oin rezulta kanek.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiravés baku lezada, depoisde akontese sira di'ak malu ona, nune'e tribunál konklui prosesu ne'e kondena arguidu komete krime ofensa ba integridade fizika simples ho natureza violénsia doméstika ho pena prizaun tinan ida no kondena arguidu komete krime arma brankas ho pena prizaun tinan tolu, tribunal halo komula jurídiku no fó pena únika tinan tolu suspende ba tinan tolu.

9. Krime ofensa ba integridade fizika simples ho natureza violénsia doméstika

Nú. Prosesu : 0035/21. BCBCV
Kompozisaun tribunál : Singulár
Juís : Dra. Sribuana da Costa
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Pena prizaun fulan 1 suspende ba tinan 1

Iha 09 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade fízika simples natureza violénsia doméstika ne'ebé envolve arguidu JdC hasoru nia feen, iha Munisípiu Baukau.

Akuzasaun prokuradór nian

Prokuradór akuza katak iha 12 Abril 2021 iha oras tuku 11:00 kalan arguidu ko'us lezada husi kama laran riba ba rai rezulta lezada nia kotuk no liman kona rai sente moras, arguidu kontinua tuku lezada nia matan parte loos no buti lezada nia kakorok. Antes ne'e arguidu ho lezada diskute malu kona-ba lezada sunu arguidu nia karta ne'ebé arguidu hakerek no tau hela iha ortoriu.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha produsaun ba prova arguidu deklara katak faktu sira iha akuzasaun ne'e loos hotu, tanba de'it lezada sunu fali arguidu nia karta ne'ebé arguidu rai iha ortoriu oin nune'e mak arguidu hirus no halo agresaun hasoru lezada. Depoisde akontese liu loron rua di'ak malu fali kedas, arrepende ninia hahalok, foin primeiravés mai hatan iha tribunál, to'o agora arguidu la baku ona lezada no arguidu serbisu hanesan bada'en ho vensimentu kada fulan US\$115.00.

Enkuantu lezada konfirma ho akuzasaun no deklara katak lezada haree arguidu hakerek karta ida tau iha ortoriu karta ne'e ko'alia kona-ba domin de'it tanba ne'e mak lezada foti sunu tiha surat ne'e no konfirma arguidu nia deklarasaun katak depoisde akontese liu loron rua sira di'ak malu no to'o agora la baku ona lezada.

Alegasaun finál

Prokuradór provadu katak arguidu komete krime hasoru lezada bazeia ba arguidu nia deklarasaun no lezada nia konfirmasaun. Mezmu sira di'ak malu ona no arguidu foin primeiravés baku lezada, maibé atu prevene arguidu ninia hahalok ne'e iha futuru atu la bele hatoman-an rezolve kualker problema uma laran tenke ho violénsia, nune'e husu ba tribunál atu kondena arguidu ho pena multa.

Enkuantu defeza haktuir katak arguidu konfesa faktu hotu, di'ak malu ona ho lezada, arrepende ninia hahalok, durante forma família foin primeiravés halo agresaun hasoru lezada, nune'e husu ba tribunál atu fó pena ne'ebé maiz adekuadu arguidu.

Desizaun

Depoisde avalia faktu hotu, tribunál prova katak arguidu ko'us lezada husi kama laran riba ba rai rezulta lezada nia kotuk no liman kona rai sente moras, tuku matan parte loos no buti lezada nia kakorok.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

10. Krime ofensa ba integridade fízika simples natureza violénssia doméstika

Nú. Prosesu	: 0001/21. BCPVN
Kompozisaun tribunál	: Singulár
Juís	: Dra. Sribuana da Costa
Prokuradór	: Dr. Bartolomeu de Araújo
Defeza	: Dr. António Fernandes
Desizaun	: Pena prizaun fulan 1 suspende ba tinan 1

Iha 09 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade fizika simples natureza violénsia doméstika ne'ebé envolve arguidu TMdS hasoru nia feen, iha Munisípiu Baukau.

Akuzasaun prokuradór nian

Prokuradór akuza katak iha laron kinta-feira 18 Fevreiru 2021 iha oras tuku 06:00 dadeer lezada husu arguidu atu ba venilale meibé arguidu la aseita nune'e lezada aruma roupa, derepente arguidu foti besi almunium baku dala ida iha lezada nia liman parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD

Produsaun ba prova sira

Iha produsaun ba provas arguidu deklara katak momentu ne'e arguidu atu ba natar no ema uma la iha, lezada hakarak ba ne'e mak arguidu hirus uza besi baku dala ida iha lezada nia liman parte loos, arguidu rasik mak komu fali lezada nia liman. depoisde akontese lora ne'e kedada di'ak malu fali, arrepende ba ninia hahalok, primeiraves mai hatan iha tribunál, agora arguidu la baku ona lezada no arguidu servisu nu'udar agrikultór rezultadu hodi sustenta de'it ba familia.

Enkuantu lezada konfirma ho akuzasaun no deklara katak antes ne'e lezada husu arguidu ba nia inan aman iha Venilale bainhira lezada aruma roupa atu ba derepente arguidu uza besi baku dala ida iha lezada nia limana parte loos sente moras no bubu, lezada kontinua ba Venilale no konta ba nia avo hafoin nia avo ba hato'o keisa iha eskuadra Polisia Venilale no deklara tan katak depoisde akontese arguidu ba tuir lezada iha Venilale sira di'ak malu no fila ba sira nia uma to'o agora la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun ne'ebé nia komete no konfirma mós husi lezada katak agresaun ne'e lezada sente moras no bubu iha liman, ne'e mak lezada desvia husi arguidu ba fali nia inan aman nia uma, mezmua sira di'ak malu maibé nafatin tau prevensaun ba arguidu ninia hahalok iha futuru hodi labele hatoman-an uza violensia iha kualker problema. tanba ne'e husu ba tribunál atu kondena arguidu ho pena prizaun fulan ida suspende ba tinan ida.

Entretantu, defeza husu ba tribunál atu aplika pena ne'ebé justu ba arguidu tanba arguidu konfesa, arrepende ninia hahalok, di'ak malu ona ho lezada no foin primeiraves mai hatan iha tribunál.

Desizaun

Depoisde avalia faktu hotu, tribunál prova katak arguidu foti besi almunium baku dala ida iha lezada nia liman parte loos.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiraves mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida

11. Krime ofensa ba integridade física simples ho natureza violénsia doméstika

Nú. Prosesu	: 0007/21. BCVMS
Kompozisaun Tribunál	: Singulár
Juis	: Dra. Maria Modesta d. A. Viera
Prokuradora	: Dr. Julio da Silva Correia
Defeza	: Dr. José Maria Caetano Guterres
Desizaun	: Pena prizaun fulan 1 suspende ba tinan 1

Iha 09 Novembru 2021, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu RJGS hasoru nia feen, iha Munisípiu Baukau.

Akuzasaun Prokuradór

Prokuradóra akuza katak iha 26 Maiu 2021 iha oras tuku 11:00 arguidu fó osan US\$11.00 ba lezada depois arguidu husu fila-fali osan refere no lezada hatan dehan *'osan ne'e ó fo tiha ona ba hau núsa mak ó husu tui-tuir hela de'it ne'e hau nia oan nia presiza la iha ka*. Arguidu mós hatan, hodi trata no tolok lezada, halo lezada sente moe no tanis maibé arguidu hirus liutan no halo agresaun hasoru lezada, tuku dala ida iha lezada nia hasan parte loos no riba lezada nia oin ba parede rezulta monu ba rai.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak fó osan US\$11.00 ba lezada no arguidu husu fali US\$2.00 atu sosa sigaru maibé lezada fó fila hotu kedas, ne'e mak arguidu hirus halo agresaun hasoru lezada hanesan hakerek iha akuzasaun, arrepende ninia hahalok, foin primeiravés mai hatan iha tribunál, depoisde akontese di'ak malu ona to'o agora la baku ona lezadu, arguidu serbisu nu'udar agrikultór rezultadu hodi sustenta de'it ba família

Alende ne'e, lezada kontinua konfirma faktu sira iha akuzasaun no konfirma arguidu nia deklarasaun hotu, depoisde akontese sira di'ak malu ona no to'o agora la baku ona lezada.

Alegasaun finál

Prokuradór haktuir katak iha prosesu julgamentu arguidu konfesa faktu sira ne'ebé imputa ba nia, lezada mós konfirma faktu sira iha akuzasaun arguidu provadu komete krime hasoru lezada tuir akuzasaun prokuradór nian. Maske nune'e nafatin tau prevensaun ba arguidu nia hahalok hodi garantia membru família nia moris iha futuru. Nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza husu ba tribunál atu fó justisa ne'ebe maiz adekuaudu ba arguidu tanba arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál.

Desizaun

Depoide avalia faktu sira hotu, tribunál prova katak arguidu tuku dala ida iha hasan parte loos riba lezada nia oin ba parede rezulta monu ba rai.

Bazeia ba faktu sira ne'e hotu no tetu mós ba sirkunstánsia atenuante sira hanesan arguidu konfesa ba faktu, arguidu primeiravés baku lezada, arguidu arrepende ba nia

hahalok, foin primeiravés mai hatan iha tribunál no promete sei la halo tan nia hahalok ne'e hasoru lezada no membru família sira seluk iha futuro, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

12. Krime ofensa ba integridade fizika simples ho natureza violénsia doméstika

Nú. Prosesu : 0020/21. BCQLC
Kompozisaun Tribunál : Singulár
Juis : Dr. José António d. Escurial,
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena multa U\$S15.00

Iha 22 Novembru 2021, Tribunál Distritál Baukau prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 14 Maiu 2021 iha oras tuku 20:00 kalan lezada bolu arguidu atu ba han kalan nian maibé arguidu hatan ó tui-tuir de'it hau ne'e núsa, lezada hatan dehan *'hau tui-tuir ó ne'e haruka ó atu han kalan*. Nune'e sira diskute malu no arguidu nerbosu basa dala ida iha hasan parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarasaun katak depoisde akontese iha dadeer lezada ba hatu'o keixa ba Polisia no fila husi eskuadra Polisia sira di'ak malu kedas, durante sira moris hamutuk desde tinan 2019 foin primeiravés halo agresaun hasoru lezada, arrepende ninia hahalok, foin primeiravés mai hatan iha tribunál. Arguidu nu'udar agrikultór rezultadu hodi sustenta de'it ba família.

Alende ne'e, lezada kontinua konfirma faktu sira iha akuzasaun no konfirma arguidu nia deklarasaun hotu, depoisde akontese sira di'ak malu ona no to'o agora la baku ona lezada.

Alegasaun finál

Prokuradór haktuir katak arguidu konfesa faktu hotu iha akuzasaun ne'ebé imputa ba nia no konfirma mós husi lezada katak arguidu halo krime ho libre vontade no konsekuensia rasik iha agresaun ne'e rejulta lezada moras iha hasan parte loos

mezmu sira di'ak malu maibé nafatin tau prevensaun ba arguidu nia hahalok iha futuru, tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu aplika pena ne'ebé kamaan liu ba arguidu tanba arguidu konfesa livre vontade, arrepende ninia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu hirus basa dala ida iha hasn parte loos.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiraves baku lezada, depoisde akontese sira di'ak malu ona, nune'e tribunál konklui prosesu ne'e no kondena arguidu ho pena multa US\$15.00 kada loron 0,50 sentavus durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

13. Krime ofensa ba integridade fizika simples ho natureza violéncia doméstika

Nú. Proses : 0013/21. BCVMS
Kompozisaun tribunál : Singulár
Juís : Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. José Maria Caetano Guterres
Desizaun : Pena prizaun fulan 3 suspende ba tinan 1

Iha 22 Novembru 2021, Tribunál Distrital Baukau prezide Julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu SSB hasoru nia feen, iha Munisípiu Baukau.

Akuzasaun prokuradór nian

Prokuradór akuza katak iha 23 Setembru 2021 iha oras tuku 17:30 kalan arguidu ba sosa tua mak lezada la hatan no hadau save motor husi arguidu nia liman, arguidu nerbozu tuku dala ida iha lezada nia rein-toos, tebe dala ida iha lezada nia hirus matan rezulta lezada monu kedas ba rai hafoin lezada hakilar ba família sira hodi mai satan netik no arguidu kontinua tuku dala ida iha lezada nian kanuruk, lezada ba halo tratamentu iha sentru saúde Vemassee.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara momentu família sira ajuda halo sira nia uma han no hemu tua mak tua hotu ona nune'e arguidu atu ba sosa tan tua mak lezada la

hatan nune'e arguidu hirus halo agresaun hasoru lezada hanesan iha akuzasaun. Depoizde akontese arguidu fila husi Polisia sira di'ak malu kedas, arrepende ninia hahalok, foin primeiravés mai hatan iha tribunál no promete sei la komete tan krime hasoru lezada ka membru familia sira iha futuru. Arguidu nu'udar agrikultór halo natar rezultadu hodi sustenta de'it ba familia.

Alende ne'e, lezada kontinua konfirma faktu sira iha akuzasaun no deklarata katak arguidu nia agresaun hasoru lezada iha publiku rezulta lezada moe depoizde akontese sira di'ak malu ona no to'o agora arguidu la baku ona lezada.

Alegasaun final

Prokuradór haktuir katak bazeia akuzasaun no produsaun ba prova provadu katak arguidu komete krime hasoru lezada no lezada mos sente moe iha tempu ne'eba mezmua sira di'ak malu maibe nafatin tau prevensaun ba arguidu nia konduta iha futuru, tanba ne'e husu ba tribunál atu kondena arguidu ba pena prizaun fulan ida suspende ba tinan ida.

Entretantu, defeza haktuir katak iha audiénsia julgamentu arguidu konfesa integralmente ba faktu sira hotu ne'ebé imputa ba nian, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e husu ba tribunál aplika pena ne'ebé maiz adekuaudu ba arguidu.

Desizaun

Depoizde avalia faktu hotu, tribunál prova katak arguidu tuku dala ida iha lezada nian rein toos, depoiz arguidu tebe dala ida iha lezada nia nia hirus matan rezulta nian monu kedas hafoin lezada hakilar familia sira mai stan netik no arguidu kontinua tuku dala ida iha lezada nian kanuruk.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiraves baku lezada, depoizde akontese sira di'ak malu ona, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida

14. Krime ofensa ba integridade física simples ho natureza violénsia doméstika

Nú. Prosesu : 0003/21. MNMNT
Kompozisaun Tribunál : Singulár
Juis : Dra. Maria Modesta d. A. Veira
Prokuradór : Dr. Bartolomeu de Araújo
Defeza : Dr. António Fernandes
Desizaun : Pena prizaun fulan 3 suspende ba tinan 1

Iha 22 Novembru 2021, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MNdJC hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 19 Fevreiro 2021 iha oras tuku 20:45 kalan, iha momentu ne'e sira nia oan tanis, arguidu ba tuur iha viziñu nian uma nune'e lezada ba bolu arguidu atu fila ba uma, bainhira arguidu fila ba uma arguidu ho lezada diskute malu kedas halo arguidu nerbozu basa dala ida iha lezada nia kotuk laran, basa dala ida iha lezada kabaas, basa dala ida iha kakorok no hakuak lezada dudu ba kotuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu deklara katak momentu ne'e arguidu ajuda nia tiun kahor masa hodi halo haris fatin mak lezada bolu hela de'it ne'e mak arguidu hirus ba sira uma basa dala ida iha hasan, lezada atu halai mak arguidu hakuak netik husi kabaas, arguidu la basa kotuk laran, la basa kakorok no basa kabaas. Depoisde akontese arguidu fila husi Polisia sira di'ak malu fali ona, foin primeiravés mai hatan iha tribunál no promete sei la komete tan krime seluk hasoru lezada ka membru família sira iha futuro. Arguidu nu'udar badaen halo uma dala ida hetan rendementu US\$2000.00.

Alende ne'e, lezada kontinua konfirma faktu sira iha akuzasaun no deklara katak momentu nee arguidu ajuda tiun sira hodi halo haris fatin tanba sira nia oan tanis no lezada mós kondisaun isin-rua ne'e mak haruka sira nia oan ba fó hatene arguidu atu fila mai uma bainhira arguidu fila mai uma lezad hakilar ne'e mak kala arguidu nervozu halo agresaun maibé depoisde akontese sira di'ak malu ona no to'o agora arguidu la baku ona lezada.

Alegasaun finál

Paokuradór haktuir katak, arguidu deklara parsialmente maibé lezada nafatin mai konfirma akuzasaun sein rezerva, motivasaun ne'e la nesesariu ba arguidu atu halo agresaun hasoru lezada, mezmu sira di'ak malu oan maibé nafatin husu ba tribunál atu kondena arguidu ba pena prizaun fulan ida suspende ba tinan ida.

Enkuantu defeza husu ba tribunál fo pena maiz adekaudu ba arguidu mezmu arguidu nega faktu balun iha akuzasaun, di'ka malu ona, arrepende ba nia hahalok, depoisde akontese to'o agora la baku ona lezada.

Desizaun

Depoisde avalia faktu hotu, tribunál prova katak arguidu basa dala ida iha kotuk laran, basa dala ida iha kabaas, basa dala ida iha kakorok no hakuak lezada dudu ba kotuk.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiraves baku lezada, depoisde akontese sira di'ak malu ona, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida

15. Krime ofensa ba integridade física simples no arma brankas

Nú. Prosesu : 0108/20. BCBCV
Kompozisaun Tribunál : Koletivu
Juis : Dr. José António d. Escurial no Dra. Maria Modesta d. A. Viera no Dra. Sribuana da Costa
Prokuradór : Dr. Bartolomeu de Araújo
Defeza : Dr. José Maria Caetano Guterres
Desizaun : Pena únika tinan 3 suspende ba tinan 3

Iha 23 Novembru 2021, Tribunál Distrital Baukau prezide Julgamentu leitura akordaun ba krime ofensa ba integridade física simples no arma brankas ne'ebé envolve arguidu Samuel Ximenes do Santos hasoru lezada Zenilda Parada Ximenes no Natércia Ave Ferreira Ximenes, iha areai Rakalele suku Tirilolo Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 25 Setembru 2020 iha oras tuku 23:00 kalan lezada sira sae motor husi uma RSS vila nova atu ba direisaun sentral iha vila antiga to'o iha dalan areia rakalele nia arguidu kaer katana ida direktamente taa zenilda nia liman kanek no taa Natersia nia ain kanek

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no Artigu 20 (1), artigu 2 (2 alinea f) Lei Arma Brankas ho muldura penal tinan 3 to'o tinan 6.

Antes tama ba produsaun ba prova sira, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu no lezada sira relasiona ho krime ofensa ba integridade física simples tanba kazu ne'e klasifika nu'udar krime semi-públiku no nia prosedimentu depende ba keixa. Iha tentative konsiliaun ne'e arguidu ho konsensia rasik husu deskulpa no ho osan US\$ 200.00 ba lezada nain ruan hodi kura fali sira nia kanek no lezada sira mos konkorda.

Iha prosesu konsiliaun ne'e, lezada hakarak deziste nia keixa hasoru arguidu relasiona ho krime ofensa ba integridade física simples ne'e. Bazeia ba konkordánsia husi parte rua, tribunál omologa krime ofensa ba integridade física simples ne'e. Entretantu kona-ba krime arma brankas, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu deklara katak momentu ne'e arguidu mesak hemu tua sabu agua boot ida ho kondisaun lanu todan mak kaer katana la'o ba iha estrada maibé la hatene taa lezada sira. Arrepente ba ninia hahalok, foin primeiravés mai hatan iha tribunál. Arguidu nu'udar agrikultór rezultadu hodi sustenta de'it ba familia.

Tanba arguidu sira konfesa tribunál prezinde testamuña sira.

Alegasaun finál

Prokuradór haktuir katak arguidu provadu komete krime arma barnka tanba utiliza katana ba la'õ iha estrada publiku hodi uza ba krime, nafatin tau prevensaun ba arguidu nia hahalok iha futuru, husu ba tribunál atu kondena arguidu ba pena prizaun tinan tolu suspende ba tinan tolu.

Entretantu, defeza haktuir katak momentu ne'e arguidu kondisaun lanu la hatene-an uza katana ba krime haree mós sirkuntasira hanesan arguidu arrepende ba ninia hahalok, perante tribunal di'ak malu ho testamuña sira no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu kaer katana ida direitamente taa testamuna sira.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiravés baku lezada, depoisde akontese sira di'ak malu ona, nune'e tribunál konklui prosesu ne'e no kondena arguidu ho pena unika tinan tolu suspende ba tinan tolu

16. Krime omisídiu simples no arma brankas

Nú. Prosesu	: 0092/20. LASIC
Kompozisaun tribunál	: Koletivu
Juís	: Dra. Florencia Freitas no Dra. Jumiaty Maria Freitas, Dr. José Q. S. Celestino
Prokuradór	: Dr. João Marques
Defeza	: Dr. Horta Ramos (Advogadu ECM)
Desizaun	: Absolve no Pena prizaun tinan 8 no selu tasa justisa US\$20.00

Iha 25 Novembru 2021, Tribunál Distrital Baukau prezide leitura akordaun ba krime omisídiu simples no arma brankas ne'ebé envolve arguidu Armindo da Silva hasoru lezadu Aleixo dos Santos, iha postu administrativu Lospalos Munisípiu Lautein.

Akuzasaun prokuradór nian

Prokuradór akuza katak iha 08 Novembru 2020 iha 14:30 loraik arguidu hamutuk ho sasin sira hanesan Arlindo da Silva, Americo Oliveira Mario de Santa Maria sira ba kail ikan iha tasi Kom Lautein no sira fila husi tasi Kom lautein to'o iha Rasa Lospalos iha 09 Novembru 2020 iha oras tuku 08:30 dadeer katak sira to'o iha Rasa Lospalos direitamente ba sasin Arlindo da Silva nia uma hodi fahe tiha ikan hafoin arguidu fila uluk ba nia uma hodi ba ko'a tua no liu oras ida hanesan ne'e arguidu lori nia tua ba tara iha estrada hodi fa'an la kleur sasain Jerimias Von to'o mai ba sosa tan tua mutin

jerigen no sira hahu hemu ho patisku ai-farina, bainhira sasin sira hanesan Julio da Costa, Idefonso da Cruz inklui lezadau Aleixo dos Santos hemu hela tua no konverse la kleur sasin Yohanes ho arguidu mosu tan sira kontinua hemu to'o hotu, sasin Jerimias Von fo hatene tan ba sasin Yohanes hodi ba sosa tan tua mutin jerigen ida ho serveza marka Dez lata rua no sira kontinua hemu, katak bainhira hemu hela tua arguidu ho lezadu diskute malu kona ba tua serveza marka Dez ho tua mutin arguidu dehan tua mutin la forsa hanesan serveza enkuantu lezadu hatan la'e tua mutin ne'e mak orijnal. Katak iha diskute malu ne'e arguidu nervozu foti tudik no sona kedas iha lezadu nia kakorok parte kabaas rezulta lezadu mate kedas.

Prokuradór akuza arguidu komete konkursu krime kontra artigu 138 KP kona-ba omisídiu simples ho muldura penal tinan 8 to'o tinan 20 konjuga ho artigu Artigu 20 (1), artigu 2 (2 alinea f) Lei Arma Brankas ho muldura penal tinan 3 to'o tinan 6.

Produsaun ba prova sira

Iha proseu julgamentu arguidu konfesa faktu iha akuzasaun sein rezerva, arguidu agora dadauk iha prizaun preventiva arrepende tebes ba ninia hahalok ne'e tanba sona mate fali nia kolega no agora dadauk arguidu mos kastigu hela nia feen no oan nain rua, foin primeiravés mai hatan iha tribunál.

Alende ne'e, Ministeriu publiku husu ba tribunal presinde testamuna sira hotu tanba arguidu konfesa faktu sein rezerva nune'e tribunal hasai nia despaisu presinde testamuna sira.

Alegasaun finál

Prokuradór haktuir katak bazeia akuzasaun no produsaun ba prova arguidu rasik konfesa katak nia mak uza tudik sona lezadu rezulta lezadu mate arguidu komete konkursu krime omisídiu simples no arma brankas, krime rua ne'e husu ba tribunal atu kondena arguidu ba pena unika tinan sanulu resin lima kadeia.

Entretantu, defeza haktuir katak iha audensia julgamentu arguidu konfesa integralmente ba faktu sira hotu ne'ebe imputa ba nian, arrepende ninia hahalok no foin primeiravés mai hatan iha tribunál, tanba husu ba tribunal aplika pena ne'ebe maiz adekauadu ba arguidu.

Desizaun

Depoide avalia faktu sira hotu, tribunál prova katak arguidu sona iha lezadu nia kakorok parte kabaas nia hodi rezulta lezadu mate. Kona ba krime arma branka tribunal la prova tanba tudik ne'e hanesan meu ida hida uza oho lezadu

Bazeia ba faktu sira ne'e hotu no tetu mós ba sirkunstánsia atenuante sira hanesan arguidu konfesa ba faktu, arguidu primeiravés komete krime, arguidu arrepende ba nia hahalok, no foin primeiravés mai hatan iha tribunál no promete sei la halo tan iha futuro, nune'e tribunál konklui prosesu ne'e ba krime arma brankas tribunál absolve arguidu

husi prosesu maibé ba krime omisídiu simples tribunál kondena arguidu ho pena prizaun tinan ualu kadeia no kondena mos selu tasa justisa US\$ 20.00.

17. Krime ofensa ba integridade fizika simples ho natureza violénssia doméstika no ameasa

Nú. Prosesu : 0017/20. VCSIC
Kompozisaun tribunál : Singular
Juís : Dra. Florencia Freitas
Prokuradór : Dr. Julio da Silva Correia
Defeza : Dr. Sidonio Maria Sarmento
Desizaun : Omologa no pena prizaun tinan 1 (6) suspende ba tinan 2

Iha 26 Novembru 2021, Tribunál Distrital Baukau prezide Julgamentu sentensa ba krime ofensa ba integridade fizika simples natureza violénsia doméstika ne'ebé envolve arguidu LS hasoru nia feen, iha Munisípiu Vikeke.

Akuzasaun prokuradór nian

Prokuradór akuza katak iha dala fulan la lembra maibe iha tinan 2019 arguidu basa dala rua iha lezada nia hasan parte karuk no tebe dala ida iha lezada nia kelen. Iha fulan Abril 2020 iha oras tuku 23:00 kalan lezada atu ba inan aman nian uma arguidu basa dala haat iha lezada nia hasan parte loos no karu, tebe dala ida iha kelen no tuku dala ida iha kotuk laran. Iha 24 Setembru 2020 lezada iha inan aman nian uma suku Bibileo arguidu koalia liu husi telefone ameasa lezada dehan *hau sei oho ó mak hau ba prizaun*.

Prokuradór akuza arguidu komete konkurusu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no artigu 157 KP kona-ba ameasa ho moldura penál to'o tinan 1 ka multa .

Antes tama ba produsaun ba prova sira, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu no lezada relasiona ho krime ameasa hasoru lezada tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, lezada hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime ofensa ba integridade fizika simples ho natureza violensia domestika, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu deklara iha tinan 2019 mosu diskusaun kona ba arguidu hetan mane seluk nia nomor kontaktu iha lezada nia telefone iha parte WA nian ne'e mak arguidu hirus halo agresaun no iha akontes fulan Abril 2020 ne'e lezada nia namoradu mak kontaktu be lezada nia telefone liu husi WA no momentu ne'e arguidu

mak simu no mane ne'e hatan, nia ami ami rua iha relasaun namoradu ne'e mak arguidu nervozu halo agresau. Sira forma familia iha tinan 2012 sidauk iha oan, depoisde akontese to'o agora la halo ona agresau hasoru lezada to'o agora moris hamutuk nafatin nu'udar feen la'en, arrepende ba ninia hahalok arguidu nu'udar agrikultór rezultadu hodi sustenta de'it ba familia.

Alende ne'e, lezada kontinua konfirma faktu sira iha akuzasaun no deklarata katak arguidu nia agresau ne'e rezulta lezada sente moras depoisde akontese sira di'ak malu ona no to'o agora arguidu la baku ona lezada.

Alegasaun final

Prokuradór haktuir katak bazeia akuzasaun no produsaun ba prova provadu katak arguidu komete krime dala rua hasoru lezada no lezada sente moras iha tempu ne'eba mezmu sira di'ak malu maibe nafatin tau prevensaun ba arguidu nia konduta iha futuru, husu ba tribunál atu kondena arguidu ba pena unika tinan ida suspende ba tinan rua.

Entretantu, defeza haktuir katak iha audiénsia julgamentu arguidu konfesa integralmente ba faktu sira hotu ne'ebe imputa ba nian, arrepende ninia hahalok, di'ak malu ona ho lezada no foin primeiravés mai hatan iha tribunál, tanba husu ba tribunal aplika pena ne'ebe kmaan liu ba arguidu.

Desizaun

Depoide avalia faktu sira hotu, tribunál prova katak arguidu komete konkursu krime rua hasoru lezada hanesan tinan 2019 arguidu basa dala rua iha lezada nia hasan parte karuk no tebe dala ida iha lezada nia kelen. Iha fulan Abril 2020 iha oras tuku 23:00 kalan arguidu basa dala haat iha lezada nia hasan parte loos no karu, tebe dala ida iha kelen no tuku dala ida iha kotuk laran

Bazeia ba faktu sira ne'e hotu no tetu mós ba sirkunstánsia atenuante sira hanesan arguidu konfesa ba faktu, arguidu primeiravés baku lezada, arguidu arrepende ba nia hahalok, no foin primeiravés mai hatan iha tribunál no promete sei la halo tan iha futuru, nune'e tribunál konklui prosesu ne'e no kondena arguidu ho pena prizaun tinan ida fulan neen suspende ba tinan rua.

18. Krime ofensa ba integridade física simples ho natureza violénsia doméstika

Nú. Prosesu : 0004/21. VQOSU
Kompozisaun Tribunál : Singulár
Juis : Dra. Florencia Freitas
Prokuradór : Dr. Julio da Silva Correia
Defeza : Dr. Grigório Maria Lourdes de Lima
Desizaun : Pena multa US\$ 45.00

Iha 26 Novembru 2021, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu SG hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 08 Marsu 2021 iha oras tuku 19:00 lezada foti arguidu nia osan maibé la informa ba arguidu ne'e mak arguidu nervozu tolok lezada no mosu diskusaun arguidu tuku dala ida iha lezada nian rein toos.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Paokuradór haktuir katak, arguidu deklara katak momentu ne'e mosu diskusaun kona ba lezada foti arguidu nai osan arguidu nervosu basa dala iha lezada nia rein toos la'os tuku. Depoisde akontese arguidu fila husi Polisia sira di'ak malu fali ona, foin primeiravés mai hatan iha tribunál no promete sei la komete tan krime seluk hasoru lezada ka membru família sira iha futuro. Arguidu nu'udar agrikultór rezultadu hodi sustenta de'it ba família.

Alende ne'e, lezada deklara katak mosu diskusaun ne'e arguidu komu liman hamutuk mak tuku dala ida lezada nian rein toos la'os basa, depoisde akontese sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak, arguidu deklara parsialmente maibé lezada nafatin mai konfirma akuzasaun sein rezerva, motivasaun ne'e la nesesariu ba arguidu atu halo agresaun hasoru lezada, mezmus sira diak malu oan maibé nafatin husu ba tribunal atu kondena arguidu ba pena prizaun tinan ida suspende ba tinan ida.

Enkuantu defeza husu ba tribunal fo pena maiz adekaudu ba arguidu mezmus arguidu dehan basa de'it maibe lezada konfirma akuzasaun, di'ka malu ona, arrepende ba nia hahalok, depoisde akontese to'o agora la baku ona lezada.

Desizaun

Depoide avalia faktu sira hotu, tribunál prova katak arguidu tuku dala ida iha lezada nian rein toos.

Bazeia ba faktu sira ne'e hotu no tetu mós ba sirkunstánsia atenuante sira hanesan arguidu konfesa ba faktu, arguidu primeiravés baku lezada, arguidu arrepende ba nia hahalok, no foin primeiravés mai hatan iha tribunál no promete sei la halo tan iha futuro, nune'e tribunál konklui prosesu ne'e no kondena arguidu ho pena multa US\$45.00 kada lora sei selu 0,50 centavus durante lora 90. Tribunál mós fiksa pena alternativa durante lora 60 prizaun, bainhira arguidu la kumpri pena multa refere

19. Krime omisídiu simples ho forma tentada no arma brankas

Nú. Prosesu : 0013/20. MNMNT

Kompozisaun Tribunál : Koletivu

Juis : Dra. Florencia Freitas, Dra. Jumiaty Maria Freitas Dr.
José Q. S. Celestino
Prokuradór : Dr. Bartolomeu de Araújo
Defeza : Dr. José Maria Caetano Guterres
Desizaun : Absolve no pena prizaun tinan 3 suspende ba tinan 3

Iha 30 Novembru 2021, Tribunál Distritál Baukau prezide julgamentu leitura akordaun ba krime omisídiu simples ho forma tentada no arma brankas ne'ebé envolve arguidu Carlito da Costa Sarmiento hasoru Nelson Pires Sarmiento, iha postu administrativu Natarbora Vila, Munisípiu Manatuto.

Akuzasaun Prokuradór

Prokuradór akuza katak iha 27 Junu 2020 iha oras tuku 22:50 kalan iha Blok L-8 momentu ne'e lezadu hemu hela tua hamutuk ho Eurico da Costa Marques Cirilio Joao Narcisio onia uma derepente arguidu husi kotuk ho tudik sona dala rua ba lezadu kona iha kotuk laran no ulun parte kanuruk. Nune'e sasin sira evakua kedas lezadu ba sentru saude hodi halo tratamentu hetan suku pontu lima.

Prokuradór akuza komete konkursu rua kontra artigu 138 KP kona-ba omisídiu simples ho artigu 23 KP kona-ba tentativa konjuga Artigu 20 (1), artigu 2 (2 alinea f) Lei Arma Brankas.

Produsaun ba prova sira

Iha prosesu julgamentu arguidu deklar katak momentu sira hemu hamutuk lanu ona la kontrola-an no tudik ne'ebe arguidu uza ne'e bai-bain uza ba kasa antes sira mos iha problema lezadu mak baku arguidu, depoisde akontese arguidu arrepende ona ninia hahalok foin primeiraves mai hatan iha tribunal to'o agora sira sidauk diak malu.

Alende ne'e, lezadu deklar katak sira hemu derepente arguidu husi kotuk sona lezadu iha kotuk laran no ulun besik kanuruk, antes sira iha problema maibe iha natal no tinan foun sira di'ak malu, lezadu lakohi perdua arguidu no la kohi di'ak malu ho arguidu.

Alegasaun finál

Prokuradór haktuir katak haree ba produsaun prova iha audensia julgamentu arguidu provadu komete konkursu keime hasoru lezadu, arguidu odio lezadu mezmua iha loron boot natal no tinan foun sira diak malu ona maibe arguidu rai odio nafatin o lori tui-tuir tudik iha nia isin to'o tempu sira hemu tua hamutuk konsege sona lezadu. Atu preve ba arguidu nia hanoin rai odio ba malu iha futuru husu ba tribunal atu kndena arguidu ba pena efetiva tinan lima iha kadeia.

Iha parte seluk, defeza haktuir katak bazei ba produsaun prova iha audensia julgamentu sira hemu tua lanu ona no lakon konsensia nune'e arguidu konduta ne'e la'os ho intensaun maibe terminasaun lanu nian tanba ne'e husu ba tribunál atu aplika pena ne'ebe ki'ik ba arguidu.

Desizaun

Depoisde avalia faktu hotu, tribunál prova katak arguidu sona dala rua ba lezadu kona iha kotuk laran no ulun parte kanuruk. Kona ba krime arma branka tribunál la prova tanba tudik ne'e hanesan meu ida hida uza oho lezadu.

Bazeia ba faktu provadu sira no tetu mós sirkunstánsia atenuante sira hanesan arguidu foin primeiraves baku lezada, depoisde akontese sira di'ak malu ona, nune'e tribunál konklui prosesu ne'e ba krime arma brankas tribunál absolve arguidu husi prosesu maibé ba krime omisídiu simples tribunál kondena arguidu ho pena prizaun tinan tolu suspende ba tinan tolu.

20. Krime arma brankas

Nú. Prosesu : 0037/20. MNMNT
Kompozisaun Tribunál : Koletivu
Juis : Dra. Florencia Freitas, Dra. Jumiaty Maria Freitas Dr.
José Q. S. Celestino
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Pena prizaun tinan 3 suspende ba tinan 3

Iha 30 Novembru 2021, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu Jorge da Concicao hasoru Estadu RDTL, iha postu admnistrativu Natarbora Vila Munisípiu Manatuto.

Akuzasaun Prokuradór

Prokuradór akuza katak iha 15 Junu 2020 iha oras tuku 17:30 loraik iha áreia Bubur Laran testemuña hamos hela toos derepente arguidu hakilar no lori katana duni sai testemuña husi toos laran no ameasa testamuña ho liafuan dehan oho tiha nia, motivu husi akontesementu ne'e tanba disputa rai entre arguidu ho testemuña. Kazu ameasa deziste ona iha Ministériu Públiku.

Prokuradór akuza kontra Artigu 20 (1), artigu 2 (2 alinea f) Lei Arma Brankas ho ho nia moldura penál tinan 3 to'o tinan 6.

Produsaun ba prova sira

Iha prosesu julgamentu arguidu deklara katak momentu ne'e tanba problema rai arguidu uza duni katana mak ba hakilar testemuña iha toos laran, kona ba rai sira rezolve ona tuir dalan kultura, arrende ninia hahalok, foin primeiravés mai hatan iha tribunál no arguidu nu'udar agrikultór rezultadu hodi sustenta de'it ba familia.

Tanba arguidu konfesa tribunál presinde testamuña.

Alegasaun finál

Prokuradór haktuir katak arguidu konfesa faktu ne'ebe imputa ba nia katak arguidu uza duni katana ba hakilar testamuña. Nafatin tau prevensaun tanba katana ne'e uza ba atividade agrikultura la'os uza ba krime, tanba ne'e husu ba tribunál atu konden arguidu ba pena prizaun tinan tolu suspende ba tolu,

Iha parte seluk, defeza haktuir katak bazei ba produsaun prova hanesan arguidu konfesa faktu ne'ebe inputa ba nian, arrepende ba ninia hahalok no foin primeiraves mai hatan iha tribunal, tanba ne'e husu ba tribunál atu aplika pena ne'ebe maiz adekuadu ba arguidu.

Desizaun

Depoide avalia faktu sira hotu, tribunál prova katak arguidu arguidu hakilar no lori katana duni sai testamuña husi toos laran.

Bazeia ba faktu sira ne'e hotu no tetu mós ba sirkunstánsia atenuante sira hanesan arguidu konfesa ba faktu, arguidu primeiravés komete krime, arguidu arrepende ba nia hahalok, foin primeiravés mai hatan iha tribunál no promete sei la halo tan iha futuro, nune'e tribunál konklui prosesu ne'e no condena arguidu ho pena prizaun tinan tolu suspende ho tinan tolu

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl